

1466 ciem coortus, prospectum barbaro Venetoque pariter admisset; sic quoque ad mille desiderati sunt, reliqui præcipiti fuga cum signis se ad naves recepere. Duabus cladibus fractus Venetus, inde continuo in Zaynthum transmissit, ex Zayntho Methonem; hinc paucis diebus profectus in Eubœam transmissit, ubi sine negotio ullo memorabilis sex continuos menses fuit. Verum post rem ad Patras male gestam, quanquam Joanne Diedo scriba, & aliis familiaribus hortantibus, admonentibusque, culpam acceptæ cladis nullam penes eum esse, tamen dolore victus, nunquam amplius ridere visus est: demum mœrore animi & perpetuo languore victus, octavo post Patrensem pugnam mense sedens in Chalcide expiravit. Jacobus Venerius tam diu classi præfuit, donec Jacobus Lauretanus, qui decreto Patrum in demortui locum surrogatus est, in provinciam venit. Is sedecim mensibus quibus classis imperator fuit, & insulas, & omnem maritimam oram strenue ab omni hostium incursu defendit.

*Victoris
Capellii
obitus.*

1467

Per id quoque tempus, nec multo post, priusquam Lauretanus ad imperium maris est missus, etsi res Venetæ quietæ alioquin in Italia erant, nescio tamen quonam modo Bartholomæi Bergomatis, summi ea tempestate ducis, subita in Flaminiam eruptio sollicitas habuit, ac pene novo implicuit bello. Moverat is ex Gallia ingenti vi peditum equitumque, ab Angelo Acciolo & Nicolao Sudorino Florentia extorribus impulsus, facta illi spe rei optime per seditionem in Hetruria gerendæ. Hæc vulgo. Fuerunt qui crederent, illum Pauli Pontificis consilio ex Gallia movisse, ut per Flaminiam & Picœnum traductis copiis, Ferdinando Regi, a quo tributum Romanæ Ecclesiæ abnegari dicebatur, subito illius nomine bellum inferret. Sed quocunque ille consilio domo profectus est, constat tamen, ejus conatus, qui ab initio totæ Italiæ terribiles fuere, brevi omnium expectationem fefellisse, in Flaminiam nanque progressus, Galeacium Mariam Mediolani Ducem, juvenem ferocissimum, obviam habuit. Afuerunt & Ferdinandi Regis & Florentinorum copiar, illius

Bartholomæus Bergomas cognomento Collio in Flaminiam progressus rem Venetam in novi belli discrimen pene trahit.